



Rapport da quartal davart ils animals da rapina gronds 3 – 2024

30 da settember 2024

Luf

Situaziun dals trieps

Actualmain vivan almain 13 trieps en il territori chantunal. Per cumparegliar pon ins consultar l'ultim rapport da quartal (2. quartal da l'onn chalendar 2024) sut il suandant link (rapport da quartal 2/2024 sin www.wolf.gr.ch).

Triep da Stagias:

Il territori da chatscha dal triep da Stagias s'extenda sur las vischnancas da Mustér/Tujetsch/Medel (Lucmagn). Tar ils geniturs dal triep sa tracta dal luf mastgel M187 ch'è immigrà nà dal chantun Tessin e la luffa giuvna da Stagias F105. Ils 11 da fanadur 2024 ha la surveglianza da chatscha cumprovà 8 luffins.

Triep da Valgronda:

Il territori dal triep da Valgronda cumpiglia l'intschess al sid dal Rain Anterior tranter Mustér e Glion e s'extenda en la Lumnezia al sid sur il Glogn or. Vers vest cumpiglia el parts da las vischnancas da Mustér e da Medel (Lucmagn). La fin da fanadur 2024 ha la surveglianza da chatscha pudì confermar 1 luffin.

Triep dal Vorab:

Tenor las enconuschientschas actualas è il triep dal Vorab preschent al nord dal Rain Anterior tranter Vuorz e Trin sco er al sid dal Rain Anterior en ils conturns da Valendau e Versomi. Suentar in'annunzia d'ina persuna privata han ins pudì confermar mez fanadur 2024 l'emprim 2 luffins, in di pli tard la finala tut en tut 8 luffins dal triep dal Vorab.

Triep da Moesola:

Il territori dal triep da Moesola cumpiglia il territori da la vischnanca da Mesocco e – cunzunt l'enviern – da Soazza e parts da la vischnanca da Lostallo, sco er – cunzunt la stad – parts da la vischnanca da Valragn. Suentar il suspect ch'i dettia animals giuvens sin basa d'ina registraziun da tun, ha la surveglianza da chatscha pudì observar ils 14 d'avust 2024 tut en tut 6 luffins.

Triep dal Corn da Lantsch:

Tenor las enconuschientschas actualas s'extenda il territori dal triep dal Corn da Lantsch, sur parts da las vischnancas da Scharàns e da Tumleastga, sur la vallada alpina da Planeiras, da la vart sid da la Plessur en il Scanvetg fin la vart nord dal flum Alvra en il territori da la vischnanca d'Alvra. Ils 5 d'avust èn 2 luffins dal triep dal Corn da Lantsch vegnids registrads per l'emprima giada d'ina trapla fotografica. Il cumenzament da settember han ins la finala pudì cumprovar tut en tut 4 luffins.

Triep da Muchetta:

Il territori dal triep da Muchetta s'extenda sur il territori da las vischnancas da Bravuogn Filisur, da Schmiten ed al sid da la vischnanca da Tavau fin a Tavau Monstein. Ils 19 da zercladur 2024 ha la surveglianza da chatscha reussì da cumprovar 3 luffins. Suentar la mort



da l'anteriura luffa-mamma, F11, il cumenzament da l'onn, n'èsi betg cler tge femella che ha survegnì ils luffins. Ins po supponer, ch'ils luffins èn dal luf-bab da fin ussa M132.

Triep da Calderas:

Tenor cumprovas geneticas s'extenda il territori dal triep probablmain da tuttas duas varts da la Gelgia circa davent da Mulegns fin Casti ed al sid da l'Alvra tranter Casti e Solas. Il cumenzament dal 2. quartal 2024 han ins chattà las cumprovas geneticas per identifitgar ils animals dominants (M226/F187). La fin da fanadur han ins pudì cumprovar per l'emprima giada 3 luffins. Suenter avair fatg fotografias d'ulteriurs luffins ha la surveglianza da chatscha la finala pudì cumprovar mez settember tut en tut 9 luffins.

Triep da Glattwang:

Sin basa da cumprovas geneticas èsi enconuscent, ch'il territori dal triep da Glattwang cumpiglia la vart sid da la Landquart en il Partenz Davant, fin circa sin l'atezza da Claustra Serneus sco er la vart nord da la Plessur en il Scanvetg fin circa a Langwies. Fin ussa n'hai dà nagins indizis per ina reproducziun.

Triep dal Rügen:

Tenor las enconuschientschas actualas sa mova il triep dal Rügen al sid dal Pass dal Bernina en il territori da la vischnanca da Poschiavo. Il cumenzament da settember èsi reussì da cumprovar tut en tut 5 luffins. L'identificaziun genetica dal animals dominants è anc pendent.

Triep dal Jatzhorn:

Il territori dal triep dal Jatzhorn s'extenda sur grondas parts dal territori communal da Tavau (vers sid fin ca. autezza Monstein). La fin d'avust ha la surveglianza da chatscha cumprovà 4 luffins.

Triep dal Fuorn:

Il triep dal Fuorn sa mova a l'ost en direcziun dal pass dal Fuorn fin en la Val Müstair ed en il nord da Zernez fin circa ad Ardez, principalmain da la vart sid da l'En. Ils animals dominants M312 ed F98 èn vegnids cumprovads cun agid d'analisis geneticas. Suenter ch'ina trapla fotografica ha fotografà 3 luffins mez fanadur per l'emprima giada, han ins la finala pudì cumprovar 7 luffins il cumenzament d'avust.

Triep da l'Äpelti:

Suenter pliras cumprovas d'almain 2 lufs sin il territori communal da Claustra, ha ina persuna privata observà 3 luffins ils 21 da fanadur 2024. Il cumenzament d'avust èsi reussì ad in'ulteriura persuna da far ina registraziun da video da tut en tut 7 luffins. Tar ils geniturs sa tracti probablmain dals animals M307 ed F233 ch'èn vegnids cumprovads en il territori en il decurs da l'onn.

Triep dal Calanda:

Er al Calanda hai dà a partir da la fin da la stad 2023 pliras cumprovas da 2 lufs ch'èn ensemen en gir. Ils 31 d'avust 2024 èsi finalmain reussì a la surveglianza da chatscha da cumprovar 2 luffins. Tar ils geniturs sa tracti probablmain dal mastgel M286 dal triep dal Kärpf ch'è vegnì cumprovà gia pliras giadas sco er da la femella F176 ch'è vegnida cumprovada il zercladur e che deriva dal triep dal Vorab.



Pèrs da lufs e lufs singuls:

Triep dal Beverin:

Er il 3. quartal 2024 n'hai dà naginas cumprovas per la preschientscha da dapli che 2 animals en il territori da chatscha. Pia parta il UCP dal fatg, ch'il triep dal Beverin n'existia betg pli sco tal. Tuttina hai dà en il decurs da la stad donns vi da muntaneras d'animals da niz. En quest connex han ins pudì cumprovar l'animal feminin F242, ch'era fin ussa anc nunenconuschent. Las analisas geneticas dals geniturs mancan anc e vegnan a mussar, sch'i sa tracta d'in animal giuven da l'onn 2023 u d'in luf immigrà che sa mova en quest territori.

En il territori da la Val de la Forcola fin en la Val d'Arbola **en la Mesolcina** hai dà er en il 3. quartal cumprovas d'almain 2 lufs. Il settember han ins cumprovà sin la vart taliana la reproducziun da tut en tut 5 luffins. Probablmain sa tracti qua dals medems lufs. Quai n'ha dentant anc betg pudì vegnir confermà geneticamain. Fin ussa n'ha il UCP naginas cumprovas da pli che 2 lufs da la vart grischuna da quest territori.

En il territori da cunfin dal chantun Tessin cun il Grischun al sid da la Moesa è en il 3. quartal 2024 vegnids cumprovads 2 lufs. Probablmain sa tracti en quest cas da l'animal masculin M243, ch'è vegnì cumprovà il cumenzament da l'onn, e d'in ulteriur luf che n'è betg anc vegnì identifitgà.

En il 3. quartal 2024 hai dà cumprovas mo dad 1 luf en la **Bregaglia**.

En l'Engiadina hai dà er en il 2. quartal numerusas cumprovas da lufs. Sper il triep dal Fuorn en la regiun da Zernez/Val Müstair hai dà en l'**Engiadina Bassa** ulteriuras observaziuns d'almain 2 lufs ch'èn ensemen en gir. Tar l'animal feminin sa tracti probablmain dad F219 ch'è vegnì confermà geneticamain pliras giadas en quest territori. Identificaziuns geneticas dal segund luf mancan fin ussa.

Tenor las enconuschientschas da las analisas geneticas sa tracti tar il pèr da lufs en l'**Engiadin'Ota** da l'animal masculin M339 (derivanza nunenconuschenta) e l'animal feminin F162 che deriva dal triep da Calderas. Il pèr da lufs sa mova tenor enconuschientschas actualas per gronda part en il territori tranter las vischnancas da S-chanf e da Samedan. En il decurs da la stad hai dà cumprovas da 2 lufs ch'eran ensemen en gir. Fin ussa mancan dentant indizis per ina reproducziun. Er en il 3. quartal han ins pudì confermar geneticamain in luf masculin, M424, dal triep dal Fuorn ch'è naschì l'onn 2023. Quest luf sa strategna probablmain per gronda part en il territori tranter San Murezzan ed il Pass dal Bernina.

Perditas

Ina survista detagliada da las perditas e sajettadas d'animals malsauns e blessads tenor l'art. 8 LChP pon ins leger en il «[Monitoring dal management dal luf](#)» (www.luf.gr.ch >Fegls d'infurmaziun, publicaziuns, projects > Publicaziuns).

Il 3. quartal 2024 n'èn vegnidas registradas naginas perditas tar il luf.



Sajettadas da regulaziun

Durant il 3. quartal 2024 è vegnids sajettads 15 lufs. Dapli detagls davart las sajettadas pon ins leger en il «Monitoring dal management dal luf» (www.luf.gr.ch > Fegls d'infurmaziun, publicaziuns, projects > Publicaziuns).

Donns d'animals da niz tras lufs

Il 3. quartal 2024 è vegnids registrads 151 animals da niz stgarpads (guardar tabella qua sutvart).

1. quartal	nursas, chauras	lamas, alpacas	arments	equids	total
morts	0	0	0	0	0
blessads	0	0	0	0	0

2. quartal	nursas, chauras	lamas, alpacas	arments	equids	total
morts	40	0	0	0	40
blessads	0	0	0	0	0

3. quartal	nursas, chauras	lamas, alpacas	arments	equids	total
morts	147	0	4	0	151
blessads	17	0	1	2	20

Total cas confermads durant ils emprims trais quartals 2024:

Animals da niz mazzads	Animals da niz blessads
191	20

Durant il 3. quartal 2024 è vegnidas annunziadas a l'Uffizi da chatscha e pestga (UCP) 17 muntaneras da muvel grond cun cumportaments singulars. Ina reconstrucziun da l'andament da l'eveniment n'è per regla betg pussaivla ed il connex direct cun la preschientscha dal luf na po betg adina vegnir cumprovà.

Lufs munids cun emetturs

Il luf feminin F229 (nasch. 2023), ch'è vegnì munì cun in emettur il cumenzament da mars 2024, sa trategna anc adina en il territori da chatscha dal triep da Stagias.



Eveniments speziels

Sin il territori communal da Samedan hai dà ils 21. da fanadur 2024 curt suenter mezdi in inscunter tranter persunas che gievan a spass ed in luf. En quest connex è in luf restà sur in temp pli lung sper ina via da spassegiar bain frequentada. Grazia a l'annunzia immediata a la surveglianza da chatscha ha il luf pudì vegnir spaventà.

Link a [Reglas da cumportament cun il luf](#).

Urs

Er il 3. quartal 2024 ha l'Uffizi da chatscha e pestga survegnì pliras cumprovas d'in urs. Er il 3. quartal 2024 na datti nagins indizis, ch'i sa tractia da dapli ch'in urs. En vista a las cumprovas d'urs che derivan da damanaivel dal cunfin na pon ins dentant betg excluder la preschientscha da plirs urs. Ina identificaziun genetica è anc adina pendent. L'urs cumprovà pliras giadas en il territori da la vischnanca da Valsot è sa cumportà discretamain er durant il 3. quartal.

Luf-tscherver

Tut en tut èn entradas ca. 153 cumprovas da lufs-tscherver il 3. quartal 2024. La gronda part da las indicaziuns deriva dals territoris da derasaziun dal Calanda, da la Surselva, da la Val Stussavgia, da la Mantogna, da la Muntogna da Schons, da la vischnanca da Valragn sco er da la Bregaglia e da l'Engiadina Bassa. Dapi questa primavaira vegnan registradas tar il UCP er pli savens cumprovas da lufs-tscherver en l'Engiadina'Ota.

Schacal mellen

Il 3. quartal 2024 è entrada ina cumprova da schacal mellen sin il territori communal da Breil. In'ulteriura cumprova sin il territori communal da Valsot n'ha betg pudì vegnir verificada.

Dapli infurmaziuns

Sin sia pagina d'internet porscha l'Uffizi da chatscha e pestga sut www.luf.gr.ch infurmaziuns davart ils animals da rapina gronds en il Grischun.

Ultra da quai cumpara sin la pagina d'internet mintga mais il «Monitoring dal management dal luf» cun las cifras las pli novas davart il luf en il chantun.

Il sistem d'infurmaziun dad SMS è vinavant en funcziun. Las comunicaziuns stattan a disposiziun a puras e purs, a la pastriglia, ad apiculturas ed apiculturs sco er a las autoritads communalas. Per l'annunzia èsi d'inoltrar il formular sut www.luf.gr.ch > Observaziuns > Servetsch d'infurmaziun dad SMS.



Amt für Jagd und Fischerei Graubünden
Uffizi da chatscha e pestga dal Grischun
Ufficio per la caccia e la pesca dei Grigioni

Ringstrasse 10 7001 Cuir
tel. 081 257 38 92 / fax 081 257 21 89
info@ajf.gr.ch www.ajf.gr.ch

Infurmaziuns davart la situaziun dals animals da rapina gronds sin plaun naziunal chattais
Vus sut KORA.ch.

Resultats genetics sco er cumprovas da lufs pli veglias pon vegnir consultads da la publicadad
cun in retard da 90 dis sin la banca da datas online da la KORA sut www.koracenter.ch. Per
questas consultaziuns èsi necessari da sa registrar sin la pagina. Pervia d'ina migraziun da
la banca da datas, na vegnan las datas betg actualisadas ad interim.